

FORVM VVL- CANI.



FORVM Vulcani, Leandro Sulphuraria. ad finem ruina-
rum, quæ à Puteolis, Neapolitana via conspiciuntur, in Cam-
pania locus est, à conditione ac natura sic dictus; quem Stra-
bo, Forum Vulcani nominat, cum id Puteolis imminere
dicit, & campum esse planum, vndique flagrantibus sulphu-
re collibus inclusum, atque septum, vnde velut à fornacibus
exhalationes cum ingenti fremitu proficiscuntur. Plinius
hos ab antiquis campos Phlegæos ait appellatos, quod et-
iam probat Silius, inquit: Illic quos sulphure pingues Phle-
gæi legere sinus. Loci natura planè mirabilis est. Primum
aream habet oui forma prælongiorem, extenditur enim fer-
mè ped. M. D. sed in latum non amplius M. patet, vndique
perpetuis altisque collibus, ita tanquam opere conseptus, vt
aditum vnum quàm spectat Puteolos, tantum habeat. Solum areæ totum sulphure vestitum
ibi spontè nato, quamobrem & in cessu crepitat, cum sit cauernosum, vti vacua contactu so-
lent omnia. In fine lata fossa, verius rotunda, quàm formæ alterius cuiusquam apparet, aquæ
nigræ spissæq; plena, quæ perpetuò feruet, magnæque vi, fumos ingentes emittit: qua de non
solum vulgi fama est, sed etiam experimento compertum, quicquid immergatur, protinus
educi coctum, nunquam tamen non aliqua parte deficiente, quemadmodum ex Hierony-
mi Lini Bononiensis relatione habeo, qui quaternis in eam immisis ouis, tria se tantum e-
duxisse confirmauit. Non semper eodem in loco aqua, nec æquali magnitudine consistit, vti
nostestari verè possumus, etenim post annos decem iterum hac proficiscentes, parte fermè
tertia minorem, quàm prima vice conspeximus: cuius rei causa spissitas aquæ est: concre-
centibus enim sulphure ripis extremis, imminutio variatioq; contingit. Circa fossam vndi-
que scrobes in solo conspiciuntur; ex quibus acutissimi vapores sulphurei, cum intento ca-
lore prodeunt. Hac in area multæ sunt officinæ, quibus album sulphur conficitur. Ad fos-
sam, de qua diximus, equo periculosum est accedere, quòd omnia cauernosa ac infida vora-
ginibus sint: & aliquando quendam spretis peritorum monitionibus, eò adequitantem, solo
haustum absumptumque, ita, vt repentè spectantium oculis eximeretur, accolæ commemo-
rant. De sulphure, quod hic prouenit, ita Plinius: In Italia inuenitur sulphur in Neapolitano
Campanoque agro, collibus, qui vocantur Leucogabi, quod è cuniculis effossum, perficitur
igni. Colles hi passim videntur flagrare, magnosque fumos cum odore sulphureo emittere,
qui per oram illam omnem, & vsque Neapolim ventorum flatibus defertur. Quanquam ve-
rò grauis atque teter sit, ad fluxiones tamen & rheumata vehementer confert. Aqua quoque
sulphurariæ fossæ, neruos emollit, visum acuit, lachrymas & vomitum comprimit, stoma-
chi doloribus auxiliatur, fecunditatem sterilibus conciliat, febres cum frigore pellit, & in-
fecta scabie membra purgat. Colle transito, qui sulphurariam includit, ab Oriente conual-
lis est, vbi alumen conficitur, Modus est huiusmodi: Lapidès è monte Sulphurariam cin-
gente coquunt in fornacibus, eductosque coacernant, dein aquam certis ex puteis, qui hic
sunt, spatio dierum aliquot infundunt, & ad eò macerant, vt in cineres dissoluantur. Ex
ijs cineribus lixiuium confectum lignea in vasa condunt, quod paulatim circum
extremities vnciæ plerunq; crassitudine, coit, atq; solidatur, instar
cristalli vel glaciæ; ferroq; diuellendum est. Ha-
cenus Leander.